

·sawcuenh·

Lumz Bae Saeh Gaeuq

□ Danz Hijvah / 谭喜花

Duenh seizgan neix daeuj, Yangz Dauh baez roengzban, cungj gyaез boux ndeu bae henz dah youzbyaij gaijmbwq.

Mbwn heuauau, ndithaemh henjgim, unqswnh dwk ciuq doh gwnznamh. Ndaw dah raemx menhmenh coh gizgyae lae bae, seiz mbouj seiz miz saek duz bya diuq ok najraemx daeuj, gwnz raemx doq baenz aen gien baenz aen gien, doeklaeng menhmenh fubfed sanq bae, yied sanq yied gvangq. Haemhhaemh daeuj neix yawj funghgingj, yawj gyoengqvunz byaij bae byaij dauq, yawj seiqlengq va nding faex heu, Yangz Dauh caengz roxnyinh mbwq gvaq, gij simsaeм naekgywg ndawsim de hix ciemhciemh sanq bae caez lo.

Mbouj rox daj seizlawz hwnj, Yangz Dauh raen liz de mbouj gyaе miz dabsau ndeu hix ciengzciengz gyaез daeuj henz dah youzbyaij yawj funghgingj. Boux dabsau neix lengjlili, de maij daenj vunj, hoeng saeknaj cix saepsetset, yawj hwnjdaеuj aiq de miz saeh dimz youq ndawsim. Mizseiz Yangz Dauh caeuq dabsau neix song da doxciuq baez le, lwgda baez doxbungq, dabsau neix couh baenq gyaеuj muengh gvaq gizwnq bae lo. Yangz Dauh gig naemj byaij gvaqbae caeuq de dongx saek sing, hoeng, moix baez cungj dwg vah yaek ok bak youh suk roengz hoz bae.

Ngoenz ndeu, dabsau neix daenj geu vunj va huraез ndeu, gok vunj youq ndaw rumzhaemh mbinfengfeng lumj dabsien roengz lajbiengz daeuj nei, din daenj gouh haiznaeng hau giuj sang ndeu. Yangz Dauh sim diuqbubbub, lumj deng fagcax heh nei, gizsieng aen sim de mbouj roxnyinh youh deng biengjhai lo……

Yenzlaiz, dahyoux Yangz Dauh hix miz gouh haiznaeng hau lumj dabsau neix nei. Yangz Dauh caeuq dahyoux dwg doeg daihhag seiz roxnaj, song vunz daihhag bizyez ra ndaej hong, gwndaenj an'onj le, cingq dajsuenq cingj hek gwn laeuj baenzranz.

Aen mbwn cungj gyaез nyauxloengh gij vunz mizcingz, Yangz Dauh caeuq dahyoux de liz ngoenz doxaeu cij miz ndwen lai seiz, dahyoux de sawqmw h baenz ciengz binghgip he ciengxlwenx biek de bae lo. Aenvih daiq siengsim, haujlai nanz, Yangz Dauh cungj byaij mbouj okdaeuj, de lumz mbouj ndaej dahyoux. Daj dahyoux mbouj youq le, Yangz Dauh itcig boux ndeu ndang dog, gonqlaeng hix miz geij dabsau doiq de mizeiq gvaq, hoeng, cungj mbouj miz saek dabsau lawz byaij ndaej haеuj ndawsim de gvaq.

Youq gizneix bungz raen boux

dabsau soqlaiz caengz doxdongx gvaq neix daenj gouh haiznaeng hau caeuq dahyoux doxdoengz, ndawsim Yangz Dauh fouzfap andingh roengzdaeuj, song da ngaеzfwdfwd dinghdingh cimyawj gouh haiznaeng hau dabsau daenj haenx, gij yienghceij dahyoux youh okyienh youq dangqnaj. Dabsau neix hix dinghdingh cimyawj baihlaj, baihnaj couhdwg aen dah laeg, byawz liuh ndaej daengz, de daj aen daengqrin ndwn hwnjdaeuj seiz, baez byad, fwt conj roengz ndaw dah bae.

Yangz Dauh baez raen, doeksaet yat, de caengz naemj ndaej ok dwg maz saeh hawj dabsau neix baenzneix guh, gaenq diuq roengz dah bae gouq vunz lo.

Dabsau neix deng hwk ndaej naj cungj bienq heu caez, daengx ndang mbaeqsubsub saenzdedded: “Gyombaiq mwngz, gyo'mbaiq mwngz, gou mbouj rox youzraemx, caeklaiq miz mwngz, mboujnex gou couh deng raemx dumh dai bae lo. Gyo'mbaiq mwngz!” Yangz Dauh gouq hwnj dabsau neix le, dabsau neix itcig gyo'mbaiq Yangz Dauh.

Yangz Dauh doiq dabsau naеuz: “Mbouj yungh gangj baenzlai 'gyombaiq' ne, mwngz ndei di luba, ranz mwngz youq gizlawz, gou soengq mwngz baema ba.”

“Mbouj youqgaenj gvaq lo. Gou haici daeuj ne, gou gag baema couh baenz lo.” Dabsau gangj sat, haici dauqranz bae lo. Yaep ndeu, youq ndaw mokhaemh laepfub couh mbouj raen ngaеuz ciij de lo.

Dabsau neix lij dwg haemhhaemh daeuj henz dah youzbyaij, miz baez saeh haenx le, de caeuq Yangz Dauh ciemhciemh sugnaj lo. Dabsau lwnh Yangz Dauh nyi, de heuhguh Fu Dingz. Dabsau couh yienghneix gangjgangj, mbouj gangj geijlai coenz vah wnq, faj naj de cungj saepsetset, nanz ndaej raen de miz riu gvaq. Yangz Dauh cungj roxnyinh miz di geizheih.

Haemh ndeu, Fu Dingz youh beij Yangz Dauh daeuj daengz henz dah gonq, de song da hoengzhwdhwd, gwnz gemj hausek haenx lij venj miz geij ndik raemxda ndongqliklik dem. Yangz Dauh cam de dauqdaej fatseng maz saeh, yienzbonj Fu Dingz cij dwg daejfwtftwt, seizneix baez dingq Yangz Dauh baenzneix gangj, engqgya cuengqsing daej hwnjdaeuj. Yaep ndeu de doq uet raemxda doq naеuz: “Gou seiq neix mbouj miz yw gouq lo, byawz hix bang mbouj ndaej gou.” Gangj sat de nyaenx mbouj ndaej boemz gwnz mbaq Yangz Dauh bae laebdaeb daejswdswd.

Yienznaeuz Yangz Dauh caeuq Fu Dingz mbouj miz maz gvanhaeh,



cij dwg roxnaj rox aen coh ndwi, hoeng, yawjraen gij yienghceij siengsim Fu Dingz, Yangz Dauh lij dwg roxnyinh miz di sim'in.

Sim vunz mbouj dwg rin guh baenz, raen Yangz Dauh mbouj lumj vunzyak, Fu Dingz dawz gij saeh ndawsim de lwnh okdaeuj lo.

Youq bi lai gaxgonq, daxboh daxmeh Fu Dingz doengzseiz baenzbingh, ndawranz mbouj miz ngaenz, caencik beixnuengx ndaej ciq cungj ciq caez lo, lij dwg comz mbouj gaeuq cienz yw, de simgip yaek dai. Gunghswh lauxcungj rox le, naеuz ndaej ok cienz bang de. Ngoenzde lauxcungj heuh Fu Dingz bae daengz ndaw ranzbanhgoeng, sing iq cam Fu Dingz: “Gou nyienh ok ngaenz bang mwngz yw bouxlaux, mwngz guh dahyoux gou, baenz mbouj baenz?”

Fu Dingz dingq le, doeksaet caemhcaiқ simvuengz, caen ngeix mbouj daengz lauxcungj miz aen sim baenzneix. Lauxcungj youh naеuz guh youx de le, mbouj ndaej caeuq gij boux sai wnq, hix mbouj yungh bae hwnjban lo, miz dauq ranz hung gvangq he hawj de youq, miz ci hawj de hai haеujok, moix ndwen miz cienz hawj de yungh. Danghnaeuz Fu Dingz riengz de ndaej 10 bi, de couh mbat ndeu hawj Fu Dingz 300 fanh maenz, lauxcungj gangj ndaej lumj guh fangzhwnz nei.

Fu Dingz dingq dwk dingq dwk, mbouj rox baenzlawz guh cijndei, de naemj: Danghnaeuz mbouj dapwnq, mbouj miz ngaenz yw bohme h, sw hgeij gaenq mbouj rox caiq bae gizlawz ciq cienz lo. Danghnaeuz dapwnq, sw hgeijsaedcaih mbouj nyienh lumj duz roeg deng vunz gaem le dawz dauqdaeuj ciengx youq ndaw roengq

nei, baenzngoenz aеu daeuq bouxcawj angqyangz. Caiq gangj, bonjfaenh miz daegyoux gvaq lo, vih le ngaenz caeuq de doxbiek, Fu Dingz guh mbouj ok cungj saeh neix.

Ranz vaih youh deng fwn doek raq. Couh youq seizneix, daegyoux Fu Dingz gingqyienz caeuq de doxfaen lo, songde gaenq doxgyaez doxlien h ndaej 8 bi lo.

Fu Dingz caeuq daegyoux doq gunghcoz doq romcienz soengq dahnuengx daegyoux doegsaw daengz daihhag bizyez. Seizneix daegyoux lizhai de bae, caen dwg heh aen sim de ha, mehmbwk seiqvunz seizcoz miz geijlai aen 8 bi? Seizneix bohme h youh doengzseiz baenzbingh haеuj yihyen, Fu Dingz mbouj rox baenzlawz gvaq lo?

Gij saeh neix gaemh ndaej Fu Dingz yaek daimbaet bae, de cijndei daeuj daengz henz dah, caen maqmuengh miz boux he ndaej soengq saenqsim hawj de, soengq di raeujrub hawj de.

Dingq gij goj Fu Dingz le, Yangz Dauh sim naekgywgywg, de doiq Fu Dingz naеuz: “Mwngz dwg dabsau simndei simsoh youh hauqswnh ndeu. Lumz gij saeh gaeuq neix bae ba, gou nyienh caeuq mwngz caez byaij diuz loh seiqvunz raezrang neix.”

Fu Dingz cengq hung doiq da youh rongh youh ndaem de muengh dwk Yangz Dauh.

Yangz Dauh laebdaeb naеuz: “Raeuz song boux ndeindei gaemfwngz baenaj ba, gou itdingh caensim doiq mwngz, caen mbouj saenq miz maz sinhoj dwg raeuz byaij mbouj gvaqbae.”

Fu Dingz riu lo, bi lai gvaqdaeuj, de baez daih'it riu ndaej baenzneix haisim, baenzneix yiengj.